

四明叢書

張宗祥



絜齋家塾書鈔卷二

宋鄭袁 變和叔 撰

皐陶矢厥謨禹成厥功帝舜申之作大禹謨皐陶謨益稷

堯舜曰典大禹皐陶曰謨典者道之常行者也謨者言之至嘉者也典卽謨謨卽典本一也皐陶大略是論思獻納之官禹則專理會平水土皐陶雖是作士然畢竟自在朝廷朝夕於人主之側可以啟沃人主正如今刑部雖云掌刑畢竟是論思獻納之官也惟

臯陶多所獻納故曰謨禹卻專於平水土理會地平
天成底事故言功矢陳也展盡底蘊更無一毫隱匿
不盡之意謂之矢純全備具更無一毫虧遺不到之
處謂之成若使臯陶之謨猶有懷而不盡禹之功猶
有毫釐欠闕不可以言矢不可以言成申重也臯陶
所以能矢厥謨禹所以能成厥功皆緣是有一帝舜
在上方謨之未矢功之未成所以能使之矢且成者
帝舜也及謨已矢矣功已成矣帝舜之心猶不已焉
故謂之申申者重複不已之意聖人只是一箇不已

卽這不已處便是聖人唐虞之道天也維天之命於
穆不已唐虞之道所以極盛亦惟不已而已欲觀帝
舜申之處合三篇觀之便可見益稷帝曰來禹汝亦
昌言直至終篇猶是皋陶廣歌此可見其申之處三
篇本合而爲一所以孔子序書將此二句并敘三篇
到底方才見得當子細看箇申字

大禹謨

曰若稽古大禹曰文命敷于四海祇承于帝

文命文德敎命大略只是聲敎敷于四海者言其聲

教迺于四海之遠也故人多說這四海二字中國居其中環四方皆海也極天地之所覆載可謂至遠矣而聲教無不及焉古人非虛言也如奄有四海蓋實有此事曰敷于四海則實無不及也觀此如何不與天合德中庸曰聲名洋溢于中國施及蠻貊舟車所至人力所通天之所覆地之所載日月所照霜露所墜凡有血氣莫不尊親故曰配天但子細玩味此數句可見敷于四海處可見其治之蕩蕩巍巍處承繼也禹之德與堯舜之德脗合無閒所以能繼承二帝

之統若使其道有一毫不相似中閒略曾閒斷不可以言承矣

曰后克艱厥后臣克艱厥臣政乃乂黎民敏德

孔子曰爲君難爲臣不易孟子曰欲爲君盡君道欲爲臣盡臣道君臣皆欲盡其道此是第一件難事須是知其爲難臨深履薄之念斯須不忘庶幾能盡其道稍以爲易而忽之則不知其難將見君不君臣不臣矣君臣克艱於上則朝廷政事無不修舉故謂之政乃乂羣黎百姓徧爲爾德故謂之黎民敏德這乂

字與敏字便是這艱字在我者少有放漫政事便有欠闕黎民便有怠心敏不特是速有黽勉不已之意速亦在其中矣天生民而立之君使司牧之勿使失性蓋所謂司牧之責非但衣之食之而已孟子養生喪死無憾只是王道之始須是天下皆敏於德皆爲善人君子方可以無愧於君師之任唐虞之時比屋可封成周之治人有士君子之行必如此則君臣之道盡矣若使朝廷政事有不修舉羣黎百姓有不徧爲爾德君何取於君臣何取於臣君臣之間兩失其

道矣嗚呼斯其所以爲難也

帝曰俞允若茲嘉言罔攸伏野無遺賢萬邦咸寧稽于眾舍己從人不虐無告不廢困窮惟帝時克

帝舜平日在克艱上做工夫今一聞禹之言有會於心曰允若茲信其如此也於是舉堯所以克艱者言之嘉言罔攸伏者忠嘉之言悉上達而無有隱伏也後世天下有嘉謨嘉猷而不得上達者何限今觀此一句須當思何故能如此必是人主中心好之然後在彼方能無隱孟子曰夫苟好善則四海之內皆將

輕千里而來告之以善夫苟不好善則人將曰訑訑
予旣已知之矣訑訑之聲音顏色拒人於千里之外
士止於千里之外則讒諂面諛之人至若是人主好
讒佞惡忠直則天下之人何苦而犯人主之所惡哉
堯所以能使之罔攸伏這裏大有工夫惟嘉言無有
伏則在野無一賢之遺此皆不是容易的事惟如此
方是唐虞之時天生賢固欲人君用之也以天下之
賢爲天下之用所以萬邦無一不寧人主不能用賢
則不能用天下旣不能用天下何以能使萬邦之咸

寧嘉言罔攸伏是忠嘉之言無一人之隱伏也野無
遺賢是田野之間無一賢之或遺也萬邦咸寧是天
下之大無一民之不得其所也此豈非是唐虞盛時
雖然嘉言旣無伏矣野旣無遺賢矣猶且稽詢於眾
舍己之能從人之長萬邦旣咸寧矣猶且不虐無告
不廢困窮非帝堯之心孰能如此故曰惟帝時克以
言堯確然能盡此道也自嘉言罔攸伏至不廢困窮
皆是堯克艱處

益曰都帝德廣運乃聖乃神乃武乃文皇天眷命奄有

四海爲天下君

廣大也運行也言其廣大運行也變化無方謂之聖聖而至於神妙不可測謂之神凡發強剛毅皆武也寬裕溫柔皆文也戡定禍亂此是武禮樂文章此是文但不止此耳廣運二字便是克艱二字既如此廣大而又運行不已所謂聖人只是不已看嘉言罔攸伏野無遺賢之後猶且稽於眾舍己從人萬邦咸寧之後猶且不虐無告不廢困窮此所謂不已也惟其不已故聖神文武溥博淵泉而時出之不可以一德

名凡人可以一德名者皆由其功夫之有息也柳下惠之和伯夷之清便可名之以清和若是孔子聖之時如何定名得今夫天有四時春和而夏暑秋涼而冬寒皆可以一字名之若夫元氣之運行發而爲春夏秋冬夫何可以定名也此所謂聖之時也中庸論天下之至聖聰明睿知足以有臨也寬裕溫柔足以有容也發強剛毅足以有執也齋莊中正足以有敬也文理密察足以有別也卽堯之乃聖乃神乃武乃文也夫君子未至於聖人猶且不器而況聖人乎然

其所以如此自不已中來若其運行稍有時而息便偏倚而不全便淺狹而易窺惟其運行不息而聖德之盛如此所以皇天眷命奄有四海而君之舜禹益之言皆只是反覆講論明君道禹曰克艱克艱君道也舜曰惟帝時克克盡君道也益又曰爲天下君亦謂如此而後可以君天下也夫天下戴之以爲君享崇高富貴之極此豈易事要須盡其道乃可自三代以後人主鮮有知君道者其閒欲治之主亦不過知得三五分若是眞箇知得必是堯舜三代可也讀書

當識綱領如讀此處便當理會得如何是君道

禹曰惠迪吉從逆凶惟影響

惠迪者順此道者也從逆者逆此道者也大凡順這道理便吉逆這道理便凶帝德廣運乃聖乃神乃武乃文能行此道所謂惠迪也皇天眷命奄有四海爲天下君非吉而何所謂道不過只是眼前底道理聖神武文皆其所當然者順是而行吉莫大焉有形便有影有聲便有響形卽影也聲卽響也惠迪卽吉從逆卽凶也試反而思之凡有所爲無不順道當是之時

其心安其體泰所謂心廣體胖非吉而何如此則鬼神亦享之天命亦歸之凡有所爲皆逆此道當是之時仰有所愧俯有所忤非凶而何如此鬼神亦不汝饗天命亦不汝眷由是知順道之時吉已具焉從逆之時凶已萌焉皆吾之所以自取非由外求也

益曰吁戒哉儆戒無虞罔失法度罔遊于逸罔淫于樂任賢勿貳去邪勿疑疑謀勿成百志惟熙罔違道以干百姓之譽罔拂百姓以從己之欲無怠無荒四夷來王虞度也方四方未寧民生未安必反覆虞度何以寧

四方何以安生民及中國旣治邊鄙寧謚則是無可
虞度之事當此之時此心最易得不警戒雖是聖人
朝夕警戒不怠然畢竟時節不同此心猶恐因時而
變故處無虞之世常常如有事之日戰戰兢兢如臨
深淵如履薄冰如此則庶乎其治之可保也蓋治亂
相生而無常方其治時所謂亂者已伏於此觀易泰
否二卦天地交而萬物通可謂泰之極矣然上六便
有城復于隍之戒至否之九五休否是休息天下之
否以循至於泰也然便有其亡其亡繫于苞桑之戒

聖人防患未然之意深矣自古當治安之時而危亂之萌已兆者甚多漢宣帝渭上之朝見於甘露之三年而是年也元后得幸於太子實生成帝則是王氏之篡漢已兆于極盛之日矣卽此一事看無虞之世豈可以不警戒警戒之念不忘則法度自不至於失墜自一身而言動容周旋中禮一身之法度也由天下而言紀綱文物天下之法度也一身之法度卽天下之法度也吾身之法度苟顛倒錯亂則天下之法度亦顛倒錯亂矣法度二字不可輕看古人言容止